



BASES DA CONVOCATORIA DE
“AXUDAS A PERSOAS
TÉCNICAS/ADESTRADORAS
e
XUÍCES/ÁRBITROS
de
ALTO NIVEL
2023”

CÓDIGO DE PROCEDIMENTO ADMINISTRATIVO
DE400D

INDICE

1. INTRODUCCIÓN.....	3
2. OBXECTO.....	3
3. PERSOAS BENEFICIARIAS.....	4
4. FINANCIAMENTO ORZAMENTARIO.....	5
5. SOLICITUDES.....	5
6. INSTRUCIÓN E TRAMITACIÓN DO PROCEDEMENTO.....	9
7. PAGAMENTO.....	14
8. OBRIGAS DAS PERSOAS BENEFICIARIAS.....	14
9. MODIFICACIÓN DA RESOLUCIÓN, REVOGACIÓN E REINTEGRO.....	15
RÉXIME XURÍDICO.....	16

1. INTRODUCCIÓN.

A Fundación Deporte Galego é unha fundación do sector público coa condición de medio propio e instrumental da Secretaría Xeral para o Deporte, asumindo como finalidade fundacional a promoción do deporte en Galicia e, de conformidade cos seus estatutos ten encomendada, entre outras funcións, o fomento do deporte de alta competición en Galicia mediante, entre outras fórmulas, a realización de patrocinios, outorgamento de becas e concesión de axudas.

A convocatoria destas axudas abre o camiño das axudas á preparación e participación das persoas galegas que desenvolven funcións como técnicas ou adestradoras e xuíces ou árbitros, como axentes participantes e imprescindibles do desenvolvemento do deporte de alto nivel en todas as súas facetas e expresións, nos ámbitos europeo e/ou mundial.

No caso das axudas a persoas técnicas e adestradoras, resolveranse pola acreditación de resultados dirixindo a deportistas ou equipos deportivos de alto nivel, tanto en probas olímpicas/paralímpicas coma en probas non olímpicas/paralímpicas, en campionatos de Europa, campionatos do Mundo ou Xogos Olímpicos/Paralímpicos. No caso das axudas a persoas xuíces e árbitros, outorgaranse pola acreditación de participación oficial tamén en campionatos de Europa, campionatos do Mundo ou Xogos Olímpicos/Paralímpicos, pero unicamente en probas olímpicas ou paralímpicas.

A presente convocatoria non é substitutiva doutras convocatorias que poida publicar a Secretaría Xeral para o Deporte

2. OBXECTO.

Esta convocatoria ten por obxecto establecer as bases reguladoras da concesión de axudas destinadas a apoiar persoas galegas que desenvolven funcións como técnicas ou adestradoras e xuíces ou árbitros de alto nivel que acrediten os requisitos administrativos e deportivos que se desenvolven nas presentes bases.

A participación (persoas xuíces e árbitros) ou resultados deportivos (persoas adestradoras e técnicos), serán valorados dacordo aos requisitos establecidos no apartado 6 destas bases, **durante o período comprendido entre o 1 de xaneiro e o 31 de decembro de 2022.**

Co fin de facilitar a identificación dos formularios de inicio na sede electrónica da Xunta de Galicia, habilítase un enlace na Guía de procedementos e servizos co código de procedemento DE400D

3. PERSOAS BENEFICIARIAS.

Poderán ser persoas beneficiarias desta convocatoria as persoas adestradoras ou técnicas e xuíces ou árbitros de alto nivel que cumpran os seguintes requisitos:

- Ter acadado o recoñecemento pola Secretaría Xeral para o Deporte, como persoas adestradoras ou técnicas, xuíces ou árbitros de alto nivel nos anos 2022 ou 2023.
- Ter solicitado o recoñecemento como persoas adestradoras ou técnicas, xuíces o árbitros de alto nivel á Secretaría Xeral para o Deporte, previamente ao remate do prazo de solicitudes da presente convocatoria e acadado unha posterior resolución positiva.
- Declarar no momento da solicitude, con certificación federativa posterior que tramitará a Fundación Deporte Galego:
 - Ter licenza federativa en vigor.
 - Non estar cumprindo sanción disciplinaria firme en materia deportiva grave ou moi grave.
 - Nivel deportivo esixido na modalidade/especialidade na que desenvolven as súas funcións, conforme aos apartados 6.3.1. e 6.3.2.
 - Persoas técnicas e adestradoras: vinculación a un deportista ou equipo que acrediten ter conseguidos os resultados requiridos no baremo 6.3.1.
 - Persoas xuíces e árbitros: participación nas competicións detalladas no baremos 6.3.2.
- Non estar cumprindo sanción disciplinaria ou administrativa en materia deportiva de carácter grave ou moi grave.

No caso de todos os tipos de **Axuda**, a persoa solicitante deberá cumprir cos criterios específicos estipulados no apartado 6.2. *Tipos de axudas, criterios de valoración e regras comúns a todas elas.*

Non poderán obter a condición de persoa beneficiaria aquelas persoas solicitantes nas que concorra algunha das circunstancias previstas no artigo 10.2 da Lei 9/2007, do 13 de xuño, de subvencións de Galicia.

4. FINANCIAMENTO ORZAMENTARIO.

As axudas concedidas de conformidade coas presentes bases serán imputadas ao orzamento do ano 2023 da Fundación Deporte Galego con cargo á partida “1. Axudas Monetarias” por un importe de 30.000 euros.

Sen prexuízo do anterior, en virtude dun incremento dos fondos asignados a este fin, a Fundación, se o considera oportuno, poderá acordar a ampliación do importe máximo do crédito dispoñible para esta liña de axudas. En todo caso, dita ampliación quedará condicionada á declaración de dispoñibilidade do crédito necesario por parte da Fundación. A resolución de ampliación do crédito dispoñible publicarase nos mesmos medios que a convocatoria e, en ningún caso, conlevará a apertura dun novo prazo de presentación de solicitudes.

5. SOLICITUDES

5.1. Forma e lugar de presentación de solicitudes.

As persoas deportistas solicitantes interesadas presentarán a solicitude (**Anexo I**) preferentemente por medios electrónicos a través do formulario normalizado dispoñible na sede electrónica da Xunta de Galicia, <https://sede.xunta.gal>.

Para a presentación das solicitudes de forma electrónica poderá empregarse calquera dos mecanismos de identificación e sinatura admitidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

Opcionalmente, poderanse presentar presencialmente en calquera dos lugares e rexistros establecidos na normativa reguladora do procedemento administrativo común das administracións públicas.

Tamén poderán presentarse as solicitudes presencialmente no Rexistro da Fundación Deporte Galego (R/ Madrid, 2-4, 2º (Fontiñas) – 15781 Santiago de Compostela), cuxo horario de rexistro aos efectos de presentación das solicitudes referidas ás presentes bases será de 9:00 a 14:00 hora.

5.2. Documentación complementaria

As persoas interesadas deberán achegar coa solicitude a seguinte documentación:

- **Anexo II. Autorización de representación.** Unicamente nos casos nos que a persoa solicitante outorgue facultades de representación a outra persoa inicialmente allea á solicitude.
- **Anexo III. Formulario de participación (persoas xuíces e árbitros) ou mellores resultados deportivos (persoas adestradoras e técnicas), acadados en 2022.**

A documentación complementaria presentarase preferiblemente por vía electrónica. Opcionalmente, as persoas interesadas tamén poderán presentar a documentación complementaria presencialmente nos lugares e rexistros indicados no apartado 5.1 das bases.

As persoas interesadas responsabilizaranse da veracidade dos documentos que presenten. Excepcionalmente, cando a relevancia do documento no procedemento o exixa ou existan dúbidas derivadas da calidade da copia, a Administración poderá solicitar de maneira motivada o cotexo das copias achegadas pola persoa interesada, para o que poderán requirir a exhibición do documento ou da información orixinal.

Sempre que se realice a presentación de documentos separadamente da solicitude, deberase indicar o código de procedemento **DE400D** e o órgano responsable do procedemento (FUNDACIÓN DEPORTE GALEGO), o número de rexistro de entrada da solicitude e o número de expediente se se dispón del.

5.3. Comprobación de datos.

Para a tramitación deste procedemento consultarase automaticamente os datos incluídos nos seguintes documentos en poder da Administración actuante ou elaborados polas Administracións públicas, agás que a persoa interesada se opoña á súa consulta:

- DNI/NIE da persoa solicitante.
- DNI/NIE da persoa representante.
- Certificación de estar ao día do pagamento coa Seguridade Social.
- Certificado de estar ao día do pagamento de obrigas tributarias coa AEAT.
- Certificación de estar ao día no pagamento das débedas coa Administración pública da comunidade autónoma.

No caso de que as persoas interesadas se opoñan a esta consulta, deberán indicalo no cadro correspondente habilitado no formulario de inicio e achegar os documentos.

Cando así o esixa a normativa aplicable solicitarase o consentimento expreso da persoa interesada para realizar a consulta.

Excepcionalmente, no caso de que algunha circunstancia imposibilitase a obtención dos citados datos, poderase solicitar ás persoas interesadas a presentación dos documentos correspondentes.

5.4. Compatibilidade con outras axudas

Estas axudas serán compatibles con premios ou axudas económicas recibidas durante o ano 2023 procedentes de calquera outra administración, ou de entes públicos ou privados, galegos, estatais e/ou da Unión Europea ou de organismos internacionais -sen prexuízo da obriga de comunicar ao órgano concedente a súa obtención-, e incompatibles no caso de premios ou axudas económicas para deportistas concedidas por outras Comunidades Autónomas durante o ano 2023.

Será obrigatorio declarar as axudas solicitadas e/ou concedidas para o mesmo fin, segundo o propio **Anexo I** de solicitude.

5.5. Prazo de presentación de solicitudes

O prazo de presentación de solicitudes será de **10 días hábiles** a contar dende o día seguinte ao da publicación do anuncio da convocatoria no Diario Oficial de Galicia. Se o último día de prazo fora inhábil, entenderase prorrogado ao primeiro día hábil seguinte. Se no mes de vencemento non houber día equivalente a aquel en que comeza o cómputo, entenderase que o prazo expira o derradeiro día do mes.

A presentación das proposicións por unha vía diferente ás sinaladas será causa de rexeitamento ou exclusión.

5.6. Corrección de solicitudes

Unha vez revisada a documentación, publicarase a lista das solicitudes admitidas e daquelas que conteñan erros ou deficiencias na páxina web deporte.xunta.gal, dispoñendo a partires dese momento de **10 días hábiles** para que sexan corrixidas, con indicación de que, se así non o fixese, teráselle por desistido da súa petición, logo dunha resolución expresa por parte da Fundación na que así se declare a desistencia.

5.7. Notificacións

As notificacións de resolucións e actos administrativos practicaranse preferentemente por medios electrónicos. As persoas interesadas poderán decidir e comunicar en calquera momento que as notificacións sucesivas se practiquen ou deixen de practicar por medios electrónicos mediante os modelos normalizados dispoñibles.

A persoa interesada deberá manifestar expresamente a modalidade escollida para a notificación (electrónica ou en papel) no formulario.

No caso de optar pola notificación en papel practicarase a notificación segundo o establecido na normativa reguladora do procedemento administrativo común.

De conformidade co artigo 45.2 da Lei 4/2019, do 17 de xullo, de administración dixital de Galicia, as notificacións electrónicas practicaranse mediante a comparecencia na sede electrónica da Xunta de Galicia e a través do sistema de notificacións electrónicas de Galicia, Notifica.gal. Este sistema remitirá ás persoas interesadas avisos da posta a disposición das notificacións á conta de correo e/ou teléfono móbil que consten na solicitude. Estes avisos non terán, en ningún caso, efectos de notificación practicada e a súa falta non impedirá que a notificación sexa considerada plenamente válida.

As notificacións por medios electrónicos entenderanse practicadas no momento no que se produza o acceso ao seu contido, e entenderase rexeitada cando transcorresen dez días naturais desde a posta a disposición da notificación sen que se acceda ao seu contido.

Se o envío da notificación electrónica non fose posible por problemas técnicos, practicarase a notificación polos medios previstos na normativa reguladora do procedemento administrativo común.

5.8. Trámites posteriores á presentación de solicitudes

A sede electrónica da Xunta de Galicia permite as persoas interesadas realizar trámites electrónicos, con posterioridade ao inicio do expediente, accedendo á Carpeta cidadá da persoa interesada. Opcionalmente, tamén poderán tramitarse presencialmente na forma e nos lugares indicados no apartado 5.1 das bases.

5.9. Transparencia e bo goberno

Deberá darse cumprimento ás obrigas de transparencia contidas no artigo 17 da Lei 1/2016, do 18 de xaneiro, de transparencia e bo goberno, e no artigo 15 da Lei 9/2007, do 13 de xuño, de subvencións de Galicia.

En virtude do disposto no artigo 4 da Lei 1/2016, do 18 de xaneiro, de transparencia e bo goberno, as persoas físicas e xurídicas beneficiarias de subvencións están obrigadas a subministrar á Administración, ao organismo ou á entidade das previstas no artigo 3.1 da Lei 1/2016, do 18 de xaneiro, á que se atopen vinculadas, previo requirimento, toda a información necesaria para o cumprimento por aquela das obrigas previstas no título I da citada lei.

6. INSTRUCIÓN E TRAMITACIÓN DO PROCEDEMENTO.

6.1. Órgano de instrución.

O Director-Xerente da Fundación Deporte Galego será o órgano instrutor do procedemento, responsable da tramitación do mesmo.

Serán funcións do órgano instrutor:

- Revisar a documentación a presentar polas persoas deportistas coa solicitude de axuda e publicar a corrección de solicitudes, se é o caso.
- Realizar de oficio cantas actuacións estime necesarias para a determinación, o coñecemento e a comprobación dos datos en virtude dos cales se debe formular a proposta de resolución.
- Elevar a proposta de resolución das axudas ao Padroado da Fundación Deporte Galego, para a resolución definitiva.

O órgano instrutor poderá utilizar e solicitar canta documentación considere precisa para unha mellor valoración e comprobación do proxecto.

6.2. Tipos de axudas, criterios de valoración e regras comúns a todas elas.

Establécense os seguintes tipos de axudas:



I. AXUDAS PERSOAS TÉCNICAS E ADESTRADORAS:

Tipo Axuda	Importe
Axuda TA1	5.000,00 €
Axuda TA2	4.000,00 €
Axuda TA3	3.000,00 €
Axuda TA4	2.000,00 €
Axuda TA5	1.000,00 €
Axuda TA6	500,00 €
Axuda TA7	250,00 €

II. AXUDAS PERSOAS XUÍCES E ÁRBITROS:

Tipo Axuda	Importe
Axuda XA1	3.000,00 €
Axuda XA2	2.000,00 €
Axuda XA3	1.000,00 €
Axuda XA4	500,00 €

Todas as axudas axustaranse ás seguintes regras:

- A suma total de axudas concedidas non poderá superar o orzamento máximo previsto no punto 4 destas bases.
- Concederáse unha única axuda por persoa solicitante, sendo esta a de maior importe de todas ás que poidera optar, por cumprir cos criterios do baremo recollido nos apartados 6.3.1. e 6.3.2. As únicas excepcións a esta regra serán os casos de persoas soliciantes que acrediten participación (xuíces e árbitros) u resultados (técnicos e adestradores) en dúas modalidades deportivas diferentes (non especialidades nin probas diferentes).

Neste caso, percibirán as dúas axudas, sendo a de maior importe, polo 100% da súa contía máxima establecida e a de menor importe, do 50% do seu respectivo máximo establecido.

- O importe destas axudas calcularase en función da aplicación dos baremos previstos nos apartados 6.3.1. e 6.3.2.
- Dentro de cada un dos tipos de axuda todas as persoas beneficiarias percibirán a mesma cantidade económica.

- A todas as axudas se lles aplicarán as retencións legalmente vixentes en base á normativa do Imposto da Renda das Persoas Físicas.

6.3. Procedemento de concesión

As axudas concederanse en réxime de concorrencia non competitiva. En consecuencia, non será necesaria a comparación e prelación das solicitudes presentadas, atendéndose unicamente ao cumprimento efectivo dos requisitos esixidos para obter a condición de beneficiaria e á subsistencia de crédito na data de presentación da solicitude.

Unha vez rematado o prazo de solicitudes e comprobadas as que cumpren con todos os requisitos administrativos detallados nestas bases, o Órgano Instrutor enviará os anexos III cumplimentados e presentados polas persoas solicitantes, ás respectivas federacións deportivas galegas nas que declaren ter rexistrada a súa licenza federativa, para que verifiquen e certifiquen o seu contido.

Recibidas as certificacións de resultados, aplicaranse a todas os seguintes baremos, na mesma orde que se detallan a continuación, en función da información reflectida por cada federación en dita certificación.

CONSIDERACIÓNS

1. **Categoría Absoluta:** é a categoría de idade na que se desenvolva a competición deportiva de máis alto nivel da modalidade deportiva, sendo, xeralmente, aquela na que os deportistas cumpren 19 anos no seu primeiro ano natural na categoría. Non se inclúen aquí categorías posteriores tipo “veteráns” ou “grupos de idade”.
2. **Categoría Previa á Absoluta:** é aquela categoría de idade na que participan deportistas que, xeralmente, cumpran 17 ou 18 anos ao longo do ano natural no que se celebran os campionatos (xuvenil, junior...)
3. **Categoría Intermedia:** é a categoría oficialmente recoñecida de cada deporte na que participen deportistas que deixan a categoría Previa Absoluta e que estean nos primeiros anos da



categoría Absoluta (sub 19, sub 20, sub 21, sub 22, sub 23...) O órgano instructor poderá considerar unha única categoría intermedia por modalidade.

4. **No relativo as denominacións das competicións** “Campionatos do Mundo” e “Campionatos de Europa”, poderanse valorar tamén de forma idéntica as participacións ou resultados nas “Copas do Mundo” e “Copas de Europa”, cando estas competicións estean conformadas por varias probas e cunha clasificación final. En ningún caso se valorará aquí ser persoa técnica/adestradora do/a campión/oa dunha única proba, senón que solo poderá ser valorado o feito de ter sido campión/oa da clasificación final.
5. Considéranse como **Probas olímpicas/paralímpicas** aquelas incluídas no programa dos XX00/XXPP do ano 2024.
6. Nos Campionatos do Mundo e nos Campionatos de Europa, non se valorarán os resultados obtidos en **probas de equipo** naquelas especialidades nas que sexa posible participar nunha proba individual similar, atendendo a criterios relacionados co modo de execución da acción técnica, así coma cos requirimentos condicionais e fisiolóxicos da proba.
7. Valorarase un único resultado en Xogos Olímpicos/Paralímpicos, Campionatos do Mundo e Campionatos de Europa por modalidade e categoría, en concreto, aquel que teña un maior nivel deportivo.

6.3.1. BAREMO AXUDAS PERSOAS ADESTRADORAS E TÉCNICAS

AXUDAS TÉCNICOS/AS/ADESTRADORES/AS ALTO NIVEL											
Proba olímpica/paralímpica ou proba de especialidade principal de modalidade non olímpica						Proba non olímpica/paralímpica de especialidade olímpica/paralímpica ou proba de especialidade non principal de modalidade non olímpica					
Tipo Axuda	Importe	XXOO/PP	Cto Mundo		Cto Europa		Cto Mundo		Cto Europa		
			Cat Abs	Cat Prev. Abs./Interm.	Cat Abs	Cat Prev. Abs./Interm.	Cat Abs	Cat Prev. Abs./Interm.	Cat Abs	Cat Prev. Abs./Interm.	
Axuda TA1	5.000,00 €	1º posto									
Axuda TA2	4.000,00 €	2º posto	1º posto								
Axuda TA3	3.000,00 €	3º posto	2º e 3º posto	1º posto	1º posto						
Axuda TA4	2.000,00 €	4º a 8º posto	4º e 5º posto	2º e 3º posto	2º posto	1º posto					
Axuda TA5	1.000,00 €			4º e 5º posto	3º posto	2º e 3º posto	1º, 2º e 3º posto		1º posto		
Axuda TA6	500,00 €							1º, 2º e 3º posto	2-3º posto	1º posto	
Axuda TA7	250,00 €									2º e 3º posto	

6.3.2. BAREMO AXUDAS PERSOAS XUÍCES E ÁRBITROS

AXUDAS ÁRBITROS/XUÍCES ALTO NIVEL						
Proba olímpica/paralímpica						
Tipo Axuda	Importe	XXOO/PP	Cto Mundo		Cto Europa	
Axuda AX1	3.000,00 €	Participación	Cat Abs	Cat Prev. Abs./Interm.	Cat Abs	Cat Prev. Abs./Interm.
Axuda AX2	2.000,00 €		Participación			
Axuda AX3	1.000,00 €			Participación	Participación	
Axuda AX4	500,00 €					Participación

Cando se certifiquen varios resultados deportivos, só se terá en conta finalmente un único resultado, que será valorado como o mellor acadado de todas as categorías e campionatos acreditados, e que permitirá resolver a axuda co importe máis elevado das posibles a valorar, salvo as excepcións citadas no punto 6.2.

I. PROCEDEMENTO DE CONCESIÓN

Asignaranse as axudas en base aos baremos 6.3.1. e 6.3.2., por estrito orde de maior a menor importe. Se chegado o momento o crédito dispoñible fora insuficiente para poder outorgar o importe íntegro dalgún tipo de Axuda, procederase a un prorrateo proporcional entre os importes iniciais ata cubrir o crédito dispoñible, non sendo posible conceder os seguintes tipos de axuda que quedasen sen presuposto.

6.4. Resolución de adxudicación

Presentada a solicitude, o órgano instrutor procederá a comprobar que se reúnen as condicións esixidas para obter a condición de beneficiaria das liñas de axudas. De ser o caso, o órgano instrutor elevará a proposta de resolución ao Presidente do Padroado da Fundación Deporte Galego, para que este resolva por delegación.

A resolución de concesión finalizará en calquera caso, o 31 de decembro de 2023, nos termos indicados no apartado 5 das bases. O vencemento do citado prazo sen que se notifique a resolución

expresa, lexitima ao interesado para entender desestimada a súa solicitude.

As listaxes das axudas concedidas publicaranse na páxina web deporte.xunta.gal.

6.5. Aceptación da resolución

Publicadas as correspondentes resolucións, as persoas beneficiarias disporán dun prazo de **10 días hábiles** para a súa aceptación ou para presentar a súa renuncia, transcorrido o cal sen que se producise manifestación expresa, entenderase tacitamente aceptada.

No caso de que as axudas outorgadas non sexan aceptadas polas persoas beneficiarias ou que posteriormente á súa concesión se renuncie a elas, así como nos supostos do seu reintegro, non se alterará a distribución inicial do crédito entre todas as solicitudes, aínda que se aplicase a regra do prorrateo.

6.6. Reclamacións

Contra as resolucións da concesión de axudas poderán interperse reclamacións perante o órgano de adxudicación, no prazo máximo de **10 días hábiles** a contar desde a publicación das listas de persoas beneficiarias das axudas na páxina web deporte.xunta.gal, e na sede electrónica da Xunta de Galicia, <https://sede.xunta.gal>, con carácter previo á vía xudicial. O prazo para resolver as reclamacións será de dous meses.

Naqueles casos nos que algunha persoa solicitante e con axuda resolta se vise afectada colateralmente por algunha outra reclamación allea, teráselle comunicado tal circunstancia, tendo todas as partes afectadas dereito a 10 días hábiles máis para facer as alegacións que consideren oportunas.

7. PAGAMENTO

Unha vez que o Padroado da Fundación efectúe a resolución procederase ao pagamento da axuda ás persoas beneficiarias por transferencia bancaria.

Para o pagamento da axuda concedida, as persoas beneficiarias das axudas deberán ter acreditado ou deberá terse consultado, tal e como se detalla no punto 5.3. das bases, estar ao corrente das obrigas coa Axencia Estatal da Administración Tributaria, a Seguridade Social e a Xunta de Galicia (Consellería de Facenda). Non será necesario comprobalo ou acreditalo de novo se a comprobación realizada ou os certificados presentados coa solicitude están todavía en vigor no momento de proceder ao pagamento.

8. OBRIGAS DAS PERSOAS BENEFICIARIAS

As persoas beneficiarias deberán cumprir coas obrigas previstas na Lei 9/2007, do 13 de xuño, de subvencións de Galicia. En particular, durante o presente exercicio e o seguinte:

- Aceptar e cumprir todas as estipulacións establecidas nas bases desta convocatoria.
- Comunicar calquera eventualidade significativa no proxecto deportivo.
- Someterse ás actuacións de comprobación que, no seu caso, puidera efectuar a Fundación Deporte Galego, así como calquera outra actuación, sexa de comprobación e control financeiro, que poidan realizar os órganos de control competentes, tanto galegos como estatais ou comunitarios, para o que se achegará canta información lle sexa requirida no exercicio das actuacións correspondentes.
- Comunicarlle á Fundación Deporte Galego a obtención doutras axudas para o mesmo fin.
- Acreditar con anterioridade a que se dite a proposta de resolución de concesión que se encontra ao corrente no cumprimento das súas obrigas tributarias e fronte á Seguridade Social e que non ten pendente de pagamento ningunha outra



débeda coa Xunta de Galicia, na forma que se determina no punto 5.3. destas bases.

- Participar nas actividades de difusión coa fin de demostrar o grao de aproveitamento destas axudas, así como nas actividades de promoción do deporte que poida programar a Secretaría Xeral para o Deporte, a Fundación Deporte Galego e/ou os seus patrocinadores e/ou entes colaboradores.
- Proceder ao reintegro dos fondos percibidos nos supostos establecidos no apartado 9 destas bases.

9. MODIFICACIÓN DA RESOLUCIÓN, REVOGACIÓN E REINTEGRO.

9.1. Modificación da resolución

Toda alteración das condicións tidas en conta para a concesión das axudas poderá dar lugar á modificación da resolución de concesión e, eventualmente, á súa revogación.

9.2. Revogación e reintegro.

A Fundación poderá proceder, tras o apercibimento previo ás persoas beneficiarias, á revogación e/ou esixencia do reintegro da axuda, así como dos xuros de demora correspondente, nos supostos de:

- Obtención da axuda falseando as condicións requiridas para iso ou ocultando aquelas que o impedisen.
- Incumprimento das obrigas como persoa beneficiaria establecidas nestas bases.
- Resistencia, escusa, obstrución ou negativa ás actuacións de comprobación e control financeiro mencionadas no apartado 8 destas bases que se puideran acometer, no seu caso, así como o incumprimento das obrigas contables, rexistrais ou de conservación de documentos.
- Calquera incumprimento das normas fixadas polas autoridades en materia de loita anti-dopaxe, en materia de loita contra a violencia no deporte e en materia de protección integral contra a violencia de xénero.

RÉXIME XURÍDICO

As presentes bases rexeranse polo dereito privado, séndolle aplicable o artigo 120 da Lei 16/2010, de 17 de decembro, de organización e funcionamento da Administración xeral e do Sector Público de Galicia, os principios de xestión contidos no artigo 5.2. da Lei 9/2007, do 13 de xuño, de subvencións de Galicia e os de información aos que fai referencia o artigo 16 do mesmo texto legal, así como os artigos do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, que desenvolven ditos principios de xestión e publicidade.